

## Uunga siunnersuut:

### Sermip erngullu niuernermi atorineqarneri pillugit Inatsisartut inatsisaat

#### Kapitali 1

##### *Atuuffia, nassuiaatillu*

##### *Atuuffia*

§ 1. Sermip erngullu niuernermik siunertanut atornissaannut misissueqqaarnernut, atuinernullu kiisalu Kalaallit Nunaata avataani niuernissamik siunertaqartumik sermimik, imermillu avammut tunisinermut Inatsisartut inatsisaat manna atuuppoq.

*Imm. 2.* Inatsisartut inatsisaat manna malillugu ingerlatat sillimaniarneq, peqqissuseq, avatangiisit, pisuussutiniq atuneq aamma inuiaqatigiinni piujuartitsinissaq eqqarsaatigalugit illersorneqarsinnaasumik kiisalu naleqquttumik aamma, pisuni assingusuni, nunat assigiinngitsut akornanni ileqqut pitsaasut akuerisaasut naapertorlugit ingerlanneqassapput.

*Imm. 3.* Erngup nukinganik imaluunniit nukimmik pilersitsinissamut sermimik, imermillu misissueqqaarnernut, atuinernullu Inatsisartut inatsissat atuutinngilaq. Taamaattoq erngup nukinganik nukissiorfinnit imaluunniit allatigut nukimmik pilersitsivinnit imermik atorineqareersumik kuutsitamik, niuernermik siunertanut misissueqqaarnernut imaluunniit atuinernut Inatsisartut inatsisaat atuuppoq.

*Imm. 4.* Imermik pilersuinnissamut sermimut aamma imermut imaluunniit imermut sinneruttumut imermik pilersuiviit atorsinnaasaannut Inatsisartut inatsisaat atuutinngilaq.

##### *Nassuiaatit*

§ 2. Inatsisartut inatsisaanni matumani tulluuttut ima paasineqassapput:

- 1) "Avammut tunisineq": Sermimik imaluunniit imermik Kalaallit Nunaannit nunanut allanut tunisineq, annissinerlu.
- 2) "Avammut tunisinissamut akuersissut": Sermimik imermillu avammut tunisininnaanermut akuersissut, misissueqqaarnissamut akuersissummut imaluunniit atuinissamut akuersissummut ilaatillugu.
- 3) "Misissueqqaarnerit": Pisuussut qanoq imaluunniit qanoq annertutigisumik niuernermik tunngaveqarluni atorineqarsinnaanersoq naliliinissaq siunertaralugu misissuinerit.
- 4) "Misissueqqaarnissamut akuersissut": Sermimik, imermillu misissueqqaarnissamut akuersissut, § 4 malillugu tunniunneqartoq.
- 5) "Sermeq, imerlu": Kalaallit Nunaanni nunamit aamma imaanit sermeq imaluunniit imeq, matumani ilanngullugit sersersuarmit imeq, sersersuaq, tatsinit kuunniillu imeq kiisalu imaanit imeq, nukimmillu pilersuinnermit imeq sinneruttoq.
- 6) "Niuernermik siunertat": Ingerlataq sunaluunniit aningaasatigut iluanaaruteqarnissamik siunertaqartoq, matumani aamma tunisineq aqqutigalugu.

- 7) "Suliniut": Eqqarsaatigisatut niuernissamik siunertamut sermimik, imermillu misissueqqaarnissamut imaluunniit atuinissamut atatillugu qinnuteqartup ingerlatassatut kissaatigisai tamarmiusut.
- 8) "Pisuussut": Sermeq imaluunniit imeq, matumani sumiiffik imaluunniit puilasoo akuersissummi imaluunniit qinnuteqaammi pineqartoq ilanngullugu.
- 9) "Piginnittussaataasoo": Inuk inatsisitigut pisinnaatitaasoo, Inatsisartut inatsisaat manna malillugu akuersissummik tunineqartoq, tak. § 11.
- 10) "Atuineq": Pisuussut nalinginnaasumik pinngorfianit peerlugu sunaluunniit ingerlataq, matumani aamma pisuussut katersorneqaruni, pissarsiarineqaruni, suliarineqaruni, imaluunniit allatigut atorneqaruni imaluunniit peerneqaruni.
- 11) "Akuersissummik atuineq": Atuinissamut akuersissutitigut ingerlatassatut akuersissuteqarfiusut imaluunniit ingerlatassatut qinnutigineqartut.
- 12) "Aallartinnissamut piffissaliussaq": Inatsisartut inatsisaat malillugu akuersissut naaportorlugu ingerlatassatut akuerisat aallartinneqarsimanissaannut ulloq kingusinnerpaaq, tak. § 21.
- 13) "Atuinissamut akuersissut": § 4, imm. 1 malillugu tunniunneqarluni niuernermik siunertaqartumik sermimik, imermillu atuinissamut akuersissut.

## **Kapitali 2**

### *Sermip, erngullu niuernermik siunertanut atorneqarnissaannut akuersissut*

**§ 3.** Niurneq siunertaralugu sermimik, imermillu misissueqqaarnerit, atunerit aamma avammut tunisinerit Inatsisartut inatsisaat manna malillugu akuersissut tunniunneqartoq, aamma Inatsisartut inatsisaata aalajangersagai naaportorlugit aamma akuersissuteqarnissamut piunasaqaataasut Inatsisartut inatsisaat manna malillugu aalajangersarneqartut malillugit taamaallaat pisinnaapput.

*Imm. 2.* Imermut sersersuaqarfinnullu tunngasunik nalinginnaanerusunik aammalu assiliornermut tunngatillugu Naalakkersuisut misissueqqaarsinnaapput.

**§ 4.** Naalakkersuisut sumiiffimmut erseqqinnerusumik killissalersorneqartumut, piunasaqaataasullu erseqqinnerusumik aalajangersarneqartut tunngavigalugit niurneq siunertaralugu sermimik, imermillu atuinissamut misissueqqaarnissanut akuersissuteqarsinnaapput:

*Imm. 2.* Imm. 1 malillugu akuersissut, sermimut aamma imermut immikkut tunniussisoqarsinnaavoq.

*Imm. 3.* Imm. 1 malillugu akuersissut, misissueqqaarnissamut aamma atuinissamut ataatsimoortutut akuersissutitut ataatsit imaluunniit atuinissamut akuersissut ilaatinngami misissueqqaarnissamut akuersissutit tunniunneqarsinnaavoq.

*Imm. 4.* Naalakkersuisut qinnuteqaammik nalilersuinerminni tulluittut ilaatissinnaavaat:

- 1) Inuiaqatigiinni, najukkamilu soqutigisat.
- 2) Pisuussutip qanoq issusaa, piujuartitsisussamillu atuinissamut periarfissat.

3) Nunamut imaluunniit kangerlummuk, immamullu naatsorsuutigisamik kingunissai, tak. § 29.

4) Avatangiisinut imaluunniit inuussutissarsiutinut pissutsit allat.

*Imm. 5.* Misissueqqaarnissamut akuersissutinut aamma atuinissamut akuersissutinut, matumani aamma qinnuteqariaatsinut aamma nakkutilleeriaatsinut Naalakkersuisut ersarinnerusunik malittarisassiorsinnaapput.

### *Akuersissutit annertussusaat*

**§ 5.** Misissueqqaarnissamut akuersissut tunniuneqarsinnaavoq, sermip erngullu niuernermik siunertaqartumik atorineqarnissaannut teknikkikkut, aningaasatigut, avatangiisitigullu periarfissanik piginnittussaatitaasup naliliinissaa siunertaralugu, matumani aamma:

- 1) piareersaanissaq, misiligummik nioqqutissiornissaq, najoqqutassiamillu misiliinissaq siunertaralugu sermimik, imermillu annertussutsimik taasamik pissarsinikkut imaluunniit katersinikkut,
- 2) pisuussummit imaluunniit nunamik teknikkikkut, imermut, sermersuaqarfinnullu tunngasunik misissuinikkut, misissueqqissaaarnikkullu, imaluunniit
- 3) allanik ingerlatatigut imaluunniit misissuinertigut, pisuussutip niuernermik tunngavilimmik atornissaanut periarfissat pilersaarusiornissaannut, nalilerneqarnissaannullu pisariaqartut.

*Imm. 2.* Misissueqqaarnissamut ingerlatassatut akuerisaasut misissueqqaarnissamut akuersissummi aalajangersarneqassapput.

*Imm. 3.* Misissueqqaarnissamut akuersissut malillugu ingerlatat suut ingerlanneqarsinnaaneritut Naalakkersuisut ersarinnerusunik malittarisassiorsinnaapput.

**§ 6.** Atuinissamut akuersissut ukununga akuersissuteqarfiusinnaavoq:

- 1) sermimik, imermillu katersinissamut, pissarsinissamut, piareersaanissamullu,
- 2) Sermimik, imermillu tunisinissamut,
- 3) Kalaallit Nunaanni sermimik, imermillu nassiussuineq aamma assartuussineq, aamma
- 4) sermip erngullu niuernermik tunngavilinnut allatut atornissaat.

*Imm. 2.* Atuinissamut ingerlatat akuersissuteqarfiusut, atuinissamut akuersissummi aalajangersarneqassapput.

*Imm. 3.* Misissueqqaarnissamut akuersissut malillugu ingerlatat suut ingerlanneqarsinnaaneritut, Naalakkersuisut ersarinnerusunik malittarisassiorsinnaapput.

**§ 7.** Inatsisartut inatsisaat manna malillugu akuersissutinut tunniunneqartunut piginnittussaatitaasoq imaluunniit allat Inatsisartut inatsisaanni matumani pineqartut, inatsisit allat malillugit akuersissutinik pisariaqartunik pissarsinissaannut pisussaajunnaarsinneqanngillat.

## **Kapitali 3**

### *Kisermaassineq*

**§ 8.** Atuinissamut akuersissut kisermaassisussaataaffilerlugu imaluunniit kisermaassisussaataaffilernagu tunniunneqarsinnaavoq, taamaattoq tak. § 9.

*Imm. 2.* Sumiiffimmut sermimik imaluunniit imermik atuiffissatut akuersissuteqarfigineqarsimasumut tamarmut imaluunniit ilaanut kisermaassisussaataaneq tunniunneqassaaq.

*Imm. 3.* Piujuartitsisussamik atuinissaq, teknikkimut tunngasut, inuiaqatigiillu soqutigisaat eqqarsaatigalugit imaluunniit suliniutip piviusunngornissaanut ilimananngikkaluartup piviusunngortinneqarnissaanut pisariaqartillugu kisermaassisussaataaneq tunniunneqarsinnaavoq.

*Imm. 4.* Kisermaassisussaataanermt Naalakkersuisut atuisinnaanermt akuersissummi immikkut piumasaqaatinik aalajangersaasinaapput, matumani aamma kisermaassisussaataanerup atatiinnarneqarnissaa aamma pisuusummik allat atuinerat pillugit piumasaqaatit ilanngullugit.

*Imm. 5.* Kisermaassisussaataaffilerlugu akuersissummik tunniussinermt Naalakkersuisut ersarinnerusunik malittarisassiorsinnaapput.

**§ 9.** § 4, imm. 3 malillugu misissueqqaarnissamut immikkut ittumik akuersissut, kisermaassisussaataaffilernagu tunniunneqassaaq.

## **Kapitali 4**

*Sermimik, imermillu Avammut tunisineq*

*Avammut tunisinissamut akuersissut*

**§ 10.** § 4 malillugu akuersissut naapertorlugu sermeq aamma imeq nunanut allanut avammut tunineqarnissaannut Naalakkersuisut ersarinnerusunik piumasaqaateqarlutik akuersissummik tunniussisinaapput, tamanna Kalaallit Nunaata aningaasaqarneranut aamma inuiaqatigiit sooqutigisaannut, matumani pilersuinerup isumannaassusaa ilanngullugu naapertuuttut nalilerneqarpat.

*Imm. 2.* Avammut tunisinissamut akuersissut immikkut imaluunniit Inatsisartut inatsisaat manna malillugu akuersissummut ilanngullugu, matumani aamma akuersissummut piusumut tapiliullugu tunniunneqarsinnaavoq.

*Imm. 3.* Qaammatisiutit ukiuisa naaneri tamaasa qinnuteqarnikkut avammut tunisinissamut akuersissut nutarterneqartassaaq, siullermeertumilli siusinnerpaamik avammut tunisinissamut akuersissutip tunniunneranit qaammatit arfinillit qaangiunnerini.

*Imm. 4.* Avammut tunisinissamut akuersissutininik tunniussisarnernut, ilusissaannullu kiisalu avammut tunisinissamut, matumani immikkut pisoqartillugu avammut tunisinissamut killilersuinissamut imaluunniit inerteqquteqarnissamut Naalakkersuisut ersarinnerusunik malittarisassiorsinnaapput.

## **Kapitali 5**

*Piumasaqaatit**Pisinnaatitsissummik pigisaqartumut piumasaqaatit*

**§ 11.** Inatsisartut inatsisaat manna malillugu akuersissut aktianik piginneqatigiiffimmut imaluunniit piginneqataassuteqarluni ingerlatseqatigiiffimmut, Kalaallit Nunaanni angerlarsimaffeqarluni Det Centrale Virksomhedsregisterimi (CVR-registret) nalunaarsorsimasumut taamaallaat tunniunneqarsinnaavoq.

**§ 12.** Piginnittussaataitaasoq akiliisinnaassuseqassaaq, pigisaminullu aamma aningaasaatiminut tamakkiisumik atuisinnaassalluni. Piginnittussaataitaasoq akiliisarnerninik unitsitsisimassanngilaq, akiliisinnaajunnaarsimassanngilaq, pinngitsaaliissummik atorunnaarsitaasimassanngilaq, allatigulluunniit taakkununga nallersuunneqarsinnaasunik inissisimassanngilaq.

*Imm. 2.* Piginnittussaataitaasoq akilersimanngisaminik 100.000 koruuninik imaluunniit amerlanerusunik Kalaallit Nunaanni pisortani oqartussanut akiitsoqassanngilaq.

*Imm. 3.* Piginnittussaataitaasoq aamma taassumap aqutsisui, matumani qullersaqarfimmiut, siulersuisuni ilaasortat aamma teknikkikkut aqutsisut kiisalu piginnittuviit ilanngullugit, inaarutaasumik eqqartuunneqarnermikkut aningaasatigut pinerluttuliorsimasutut eqqartuunneqarsimassanngillat, suliffeqarfimmik ingerlatsisinnaajunnaarsinneqarsimassanngillat imaluunniit ingerlatseqatigiiffiup ingerlatsineranut sunniuteqarsinnaasunik allatigut killilersorneqarsimassanngillat.

**§ 13.** Piginnittussaataitaasoq akuersissut malillugu ingerlatanik ingerlatsisinnaanissaminut pisariaqartunik suliamut paasisimasaqassaaq.

**§ 14.** Piginnittussaataitaasoq piffissaq akuersissuteqarfiusoq tamakkerlugu §§ 11-13-imi piumasaqaatit naammassissavai, tak. § 38, imm. 1, nr. 1.

*Imm. 2.* Piginnittussaataitaasumut §§ 11-13-imi piumasaqaataasunik itisiliisunik, malittarisassanik Naalakkersuisut aalajangersaasinnaapput,

*Suliniummot piumasaqaatit, piumasaqaatitalerlugu atuinissamut akuersissut*

**§ 15.** Inatsisartut inatsisaat manna malillugu Naalakkersuisut atuinissamut akuersissummik tunniussisinnaapput, suliniut teknikkikkut aamma aningaasatigut ingerlanneqarsinnaasoq qinnuteqartup qularnarunnaarsippagu, taamaattoq tak. § 16, imm. 1.

*Imm. 2.* Suliniutip teknikkikkut aamma aningaasatigut ingerlanneqarnissanut uppersaanissamut aamma piumasaqaatissanut, Naalakkersuisut ersarinnerusunik malittarisassanik aalajangersaasinnaapput.

**§ 16.** Suliniutip teknikkikkut aamma aningaasatigut ingerlanneqarsinnaaneraniq qularnarunnaarsitsinissamik § 15-imi piumasaqaataasoq ukiut pingasut tikillugit piffissalerlugu naammassineqarsinnaasoq piumasaqaatitalerlugu, atuinissamut akuersissut tunniunneqarsinnaavoq.

*Imm. 2.* qularnarunnaarsitsinissamik imm. 1-imi piumasaqaataasoq naammassineqartoq Naalakkersuisut akuerereerpassuk aatsaat, atuinissamut ingerlatat aallartinneqarsinnaapput. Piumasaqaataasup naammassineqarnissaa tikillugu misissueqqaarnissamut akuersissut malillugu ingerlatat ingerlanneqarsinnaapput.

*Imm. 3.* Piffissaliussap iluani imm. 1-imi piumasaqaataasoq naammassineqanngippat, piumasaqaatitalerlugu akuersissut erngetumik atorunnaassaaq.

*Imm. 4.* Immikkut ittumik pisoqartillugu imm. 1-imi piffissaliunneqartumut Naalakkersuisut immikkut akuersissuteqarsinnaapput.

*Imm. 5.* Piumasaqaatitalugu akuersissutitut ersarinnerusunik malittarisassanik Naalakkersuisut aalajangersaasinnaapput.

## Kapitali 6

### *Akuersissutitut piumasaqaatit*

#### *Piffissaq akuersissuteqarfiusoq*

**§ 17.** Misissueqqaarnissanut aamma atuinissamut akuersissut, piffissamut ukiut 20-t tikillugit akuersissuteqarfilerlugu tunniunneqarsinnaavoq, taamaattoq tak. § 21. Piginnittussaataitanermik qinnuteqartup qinnuteqarneratigut, piffissaq akuersissuteqarfiusoq qinnuteqarnerit tamaasa ukiut qulit tikillugit Naalakkersuisut sivitsorsinnaavaat.

*Imm. 2.* Qinnuteqaammik naliliinermi, § 4, imm. 4-mi pissutsit taaneqartut saniisigut pissutsit uku Naalakkersuisut ilanngussinnaavaat:

- 1) Piginnittussaataitaasup ataavartumik nalunaarusiai, tak. § 42, pilersaarummillu ingerlatsinermi, ineriartortitsinermilu siunissami periarfissat.
- 2) Piginnittussaataitaasup akuersissuteqarnermi piumasaqaataasunik eqqortitsinera.

*Imm. 3.* Piffissap akuersissuteqarfiusup atorunnaarnissaanut qaammatit arfinillit tikitsinnagit, piffissap akuersissuteqarfiusup sivitsorneqarnissaanik piginnittussaataitaasup qinnuteqaataa tunniunneqassaaq.

*Imm. 4.* Piffissamik akuersissuteqarfiusumik sivitsuineq, atuinissamut akuersissummut tapiliussami ersarinnerusumik piumasaqaatit malillugit aalajangersarneqassaaq.

**§ 18.** § 4, imm. 3 malillugu misissueqqaarnissamut immikkut ittumik akuersissut, piffissamut ukiut pingasut tikillugit akuersissuteqarfilerlugu tunniunneqassaaq, taamaattoq tak. § 21.

*Imm. 2.* Pisinnaatitsissummik qinnuteqartup qinnuteqarneratigut, piffissaq akuersissuteqarfiusoq qinnuteqarnerit tamaasa ukioq ataaseq tikillugu sivitsorneqarsinnaavoq.

Taamaattoq misissueqqaarnissamut piffissaq akuersissuteqarfiusoq ukiunik tallimanik sivilisunerusinnaangilaq.

*Imm. 3.* Piffissap akuersissuteqarfiusup atorunnaarnissaanut qaammatit arfinillit tikitsinnagit, piffissap akuersissuteqarfiusup sivitsorneqarnissaanik qinnuteqaammik piginnittussaataasooq nassitsissaaq.

*Imm. 4.* Piffissamik akuersissuteqarfiusumik sivitsuineq, misissueqqaarnissamut akuersissummut tapiliussami ersarinnerusumik piumasaqaatit malillugit aalajangersarneqassaaq.

### *Sumiiffik akuersissuteqarfiusoq*

**§ 19.** Sumiiffiup ersarinnerusumik killilersugaasup iluani, § 4 malillugu akuersissut naapertorlugu piginnittussaataasup ingerlatsinissaminut akuersissuteqarfigisamini taamaallaat ingerlatsisinnaavoq.

*Imm. 2.* Akuersissummik ersarissarneqartumik sumiiffik akuersissuteqarfiusoq naleqqanik, killiliussanik imaluunniit sumiiffimmut allatigut pingaarutilinnik aalajangersakkatigut killilersorneqarsimasinnaavoq.

**§ 20.** Piginnittussaataasup qinnuteqarneratigut, sumiiffiup akuersissuteqarfiusup allinissaanut imaluunniit allanngortinnissaanut Naalakkersuisut aalajangiisnaapput.

*Imm. 2.* Naliliinermi, § 4, imm. 4-mi pissutsit taaneqartut saniatigut pissutsit uku Naalakkersuisut ilanngussinnaavaat:

- 1) Pisuussutit atorneqarnerini pitsanngoriaatissatut naatsorsuutigineqartoq
- 2) Piginnittussaataasup ataavartumik nalunaarusiai, tak. § 42, pilersaarummillu ingerlatsinermi, ineriartortitsinermilu siunissami periarfissat.

*Imm. 3.* Tusarniaaneq pillugu § 36-mi malittarisassat, imm. 1 malillugu aalajangiinernut assinganik atuupput.

*Imm. 4.* Sumiiffiup akuersissuteqarfiusup allanngortinneqarneranut imaluunniit allilernerqarneranut, § 4 malillugu akuersissummut tapiliussatigut Naalakkersuisut ersarinnerusumik piumasaqaasorsinnaapput.

*Imm. 5.* Sumiiffiup akuersissuteqarfiusup allilernerqarnissaanik imaluunniit allanngortinneqarnissaanik qinnuteqaatit suliarineqarnissaannut ersarinnerusunik malittarisassanik Naalakkersuisut aalajangersaasinnaapput, matumani akuersissummut piumasaqaatit ilanngullugit.

### *Ingerlatat aallartinnissaannut piffissaliussaq*

**§ 21.** Atuinissamut akuersissutip tunniunneqarneranit kingusinnerpaamik ukiut tallimat iluini piginnittussaataasooq, Inatsisartut inatsisaat manna aamma atuinissamut akuersissummi piumasaqaatit aalajangersarneqartut naapertorlugit suliniummik piviusunngortitsinissamik siunertaqartumik atuinissamik ingerlatsilersimassaaq.

*Imm. 2.* Misissueqqaarnissamut immikkut akuersissutitut, misissueqqaarnissamik akuersissutit tunniunneranit akuersissut malillugit ingerlatassat kingusinnerpaamik ukiup ataatsip iluani aallartinneqassapput.

*Imm. 3.* Imm. 1-2-mi aallartinnissamut piffissaliussaq qinnuteqarnikkut, qinnuteqarnerit tamaasa ukioq ataaseq tikillugu Naalakkersuisut sivitsorsinnaavaat, piginnittussaataasup uppersarpagu:

1) Suliniutip piviusunngortinneqarnissaa piginnittussaataasup eqeersimaartumik sulissutigisimagaa, imaluunniit

2) Suliniutip siumut ingerlanissaanut akimmiffiusumik, piginnittussaataasup aqussinnaasimanngisaanik paasinartumik pisoqarsimappat.

*Imm. 4.* Piffissaliussap atorunnaarnissaanut kingusinnerpaamik qaammatit pingasut sioqqullugit, imm. 3 malillugu aallartinnissamut piffissaliussamik sivitsuinnissamik qinnuteqaat nassiunneqassaaq.

*Imm. 5.* Imm. 1-2-mi aallartinnissamut piffissaliussap imaluunniit imm. 3 malillugu piffissaliussap sivitsorneqartup iluani akuersissut malillugu ingerlatat aallartinneqanngippata, § 4 malillugu akuersissut erngertumik atorunnaassaaq.

*Imm. 6.* Akuersissut imm. 5 malillugu atorunnaarsimasoq, piginnittussaataasup qinnuteqarneratigut paasinartumik pisoqarsimatillugu Naalakkersuisut atuutsilerseqqissinnaavaat. Atuutsilersitseqqinnermi imm. 3-mi piumasaqaataasut assinganik atuutissapput. Atuutsilerseqqinnissamik qinnuteqaat, atorunnaarsitsinnermit kingusinnerpaamik qaammatit pingasut qaangiunnerani tunniunneqassaaq.

### *Ingerlatsisussaataaneq*

**§ 22.** Inatsisartut inatsisaat manna malillugu akuersissut tunniunneqartoq malillugu, piffissaq akuersissuteqarfiusoq tamakkerlugu piginnittussaataasup ingerlatassat ingerlatissavai, taamaattoq tak. § 21 aamma 26, imm. 2.

*Imm. 2.* Imm. 1-mi ingerlatassatut piumasaqaataasumut qinnuteqarnerit tamaasa ukiut marluk tikillugit Naalakkersuisut immikkut akuersissuteqarsinnaapput, ingerlatat unitsikkallarneqarnissaannik piginnittussaataasup qinnuteqaammi :

1) uppersarpagu ingerlatat unitsikkallartariaqarnissaannut immikkut pissuteqartoq, aamma

2) ingerlatat aallarteqqinnissaanut pilersaarummik saqqummiippat.

*Imm. 3.* Ingerlatat unitsikkallarneqarnissaannik qinnuteqaat, ingerlatat unitsinneqannginnerini nassiunneqassaaq.

### *Pisuusummik allat atuinerat*

**§ 23.** Sumiiffimmi akuersissuteqarfiusumi piginnittussaataasup saniatigut allat ingerlatsisinnaanerit pillugu, matumani nammineq atugassatut imaluunniit siunertanut allanut pisuusummik allat atuisinnaanerit ilanngullugu, Inatsisartut inatsisaat manna malillugu akuersissummi Naalakkersuisut piumasaqaatinik aalajangersaasinnaapput.

### *Akiliuteqarneq*

**§ 24.** Piginnittussaataasooq sermimik, imermillu avammut tunisinermi minnerpaamik ukiumut ataasiarluni Namminersorlutik Oqartussanut akiliuteqarnissaa pillugu, akuersissummi Naalakkersuisut piumasaqaatinik aalajangersaasinnaapput.

*Imm. 2.* Ser mip imaluunniit erngup ator neqartup annertuussusia tunngavigalugu akitsuummik (tunisassiornermut akiliut) ataavartumik akiliuteqartoqartassasooq kiisalu sermimik, imermillu avammut tunisinermut atatillugu Namminersorlutik Oqartussat allaffissornermi aningaasartuutigisartagaasa matussutissaannik ukiumut tunngaviummik akiliuteqartoqartarnissaa Naalakkersuisut aalajangersaasinnaapput.

*Imm. 3.* Tunisassiorneq Kalaallit Nunaanni imaluunniit avataani pinersooq imaluunniit annertuukkuutaartunik imermik avammut tunisisoqarniarnersooq apeqqutaatillugu, imm. 1 aamma 2 malillugit akiliutit nikerarsinnaapput.

*Imm. 4.* Piumasaqaatit akuersissummi aalajangersarneqartut naapertorlugit piginnittussaataasup akiliutissat akilinngippagit, akiitsut Kalaallit Nunaanni pisortanut akiitsut akilersinniarneqartarnerini malittarisassat atuuttut naapertorlugit Akileraartarnermut Aqutsisoqarfimmit akilersinniarneqarsinniarneqarsinnaapput pisortanut akiitsutut isigineqarlutik.

*Imm. 5.* Akiliutissat naatsorsorneqarnissaat aamma annertussusissaat pillugit malittarisassanik ersarinnerusunik Naalakkersuisut aalajangersaasinnaapput, matumani suliarinninneq qanoq annertutiginersooq tunuliaqutaralugu assigiinngisitaarsitsinissaa kiisalu akiliinissaa pillugu malittarisassat ilanngullugit.

### *Taarsiineq, sillimmasiissuteqartussaataanerlu*

**§ 25.** § 4 malillugu akuersissut tunniunneqartoq malillugu ingerlatani ajoqusikkat, piginnittussaataasup taarsissavai, nalaatsornerinnarmik pigaluarpataluunniit.

*Imm. 2.* Ajoquserneqartoq piaarluni imaluunniit mianersugaalliorujussuarluni ajoqusernermut pisooqataasimappat, imm. 1 malillugu taarsiissuteqarneq annikillisinneqarsinnaavoq imaluunniit atorunnaarsinnaalluni.

**§ 26.** § 4 malillugu akuersissut tunniunneqartoq malillugu ingerlatat inuussutissarsiornermi akisussaanermut sillimmasersimassapput, allatigulluunniit qularnaveeqquserneqarsimassallutik.

*Imm. 2.* § 4 malillugu akuersissut tunniunneqartoq malillugu ingerlatat aallartinneqaqqusaanngillat, imm. 1 malillugu sillimmasersimanissamik imaluunniit qularnaveeqqusiinissamik piumasaqaat naammassineqarsimatinnagu.

*Imm. 3.* Piginnittussaataasup sillimmasiinissamut imaluunniit qularnaveeqqusiinissamut pisussaaffii pillugit piumasaqaatinik ersarinnerusunik Naalakkersuisut aalajangersaasinnaapput. Taassumap saniatigut piginnittussaataasup nioqqutinik imaluunniit

sullissinernik pilersuisuata sillimmasersimanissaanik imaluunnit allatigut qularnaveeqqusiisimanissaanik piumasaqaatinik aalajangersaasoqarsinnaavoq.

*Imm. 4.* Sillimmanersimanissamut aamma qularnaveeqqusersimanissamut piumasaqaatinik ersarinnerusunik Naalakkersuisut aalajangersaasinnaapput.

*Iluarseeqqinnissamut aningaasartuutitut qularnaveeqqusiineq*

**§ 27.** Avatangiisinik, nunatamillu pineqartumik iluarseeqqittoqassappat taakkununga aningaasartuutit matussuserneqarnissaannut piginnittussaatitaasup aningaasatigut qularnaveeqqusiisimanissaa pillugu, § 4 malillugu akuersissummi tunniunneqartumi Naalakkersuisut piumasaqaatinik aalajangersaasinnaapput.

*Imm. 2.* Suliniutip qanoq ittuunera, annertussusaa, avatangiisinut sunniutaasinnaasut kiisalu iluarseeqqinnissami aningaasartuutissatut missiliussat eqqarsaatigalugit qularnaveeqqusiussassat annertussusissaat, ilusissaallu Naalakkersuisunit aalajangersarneqassapput.

*Imm. 3.* Pissutsit annertuumik allanngorpata, Naalakkersuisut qaqugukkulluunniit qularnaveeqqusiinissamut piumasaqaatit allanngortissinnaavaat.

*Piumasaqaatinik allanik aalajangersaaneq, uppersaasiinerlu*

**§ 28.** Inatsisartut inatsisaat manna malillugu akuersissummi piumasaqaatinik allanik Naalakkersuisut aalajangersaasinnaapput, matumani aamma tulluuttut pillugit:

- 1) Uninnissaq, atorunnaarsitsineq aamma akuersissummik utertitsineq.
- 2) Piginnittussaatitaasup minnerpaamik annerpaamillu pisuussummik atuinnissaa.
- 3) Iluarsaassineq, iluarseeqqinnerlu.
- 4) Teknikkikkut, isumannaallisaanermut, pinngortitamut, avatangiisinullu tunngasut.
- 5) Sermip erngullu iluaqutissatut, illup iluani imaluunniit assigisaanik atorneqassatillugu imaluunniit atorneqartussaatillugu pitsaassutsimut tunngasut aamma peqqissutsimut tunngasut.
- 6) Sermip erngullu iluaqutissatut, illup iluani imaluunniit assigisaanik atorneqassatillugu imaluunniit atorneqartussaatillugu pitsaassusiinut tunngasunik aamma peqqissutsimut tunngasunik nakkutilliineq aamma piginnittussaatitaasup nammineerluni nakkutilliinera.

*Imm. 2.* § 4 aamma § 10 malillugit akuersissutit naapertorlugit sermip, erngullu atorneqartut aamma avammut tunisassiarineqartut qanoq pitsaassuseqarnissaannik nalunaarlugu uppersaasiinissaq pillugu malittarisassanik ersarinnerusunik Naalakkersuisut aalajangersaasinnaapput.

## **Kapitali 7**

*Pinngortitamut kingunissaanik naliliineq*

**§ 29.** § 4 malillugu Naalakkersuisut akuersisummik tunniussitinnagit, pinngortitamik illersuineq pillugu Inatsisartut inatsisaanni § 41, imm. 1-imi malittarisassat malillugit qinnuteqartoq pinngortitamut kingunisaanik nalileeppaassaaq, taamaattoq tak. § 2.

*Imm. 2.* Pinngortitamut kingunissaanik naliliinissamut piumasaqaatit pillugit kiisalu misissueqqaarnermut aamma sermimik, imermillu atuinermut atatillugu pinngortitamik illersuinissaq pillugu malittarisassanik ersarinnerusunik Naalakkersuisut aalajangersaasinnaapput.

**§ 30.** Ingerlatat nunamut, kangerlummumut aamma immamut imaluunniit pinngortitamut annertuumik ajoqusiisinnasutut ilimagineqarpat, akuersissut malillugu ingerlatat unitsinneqarnissaannik Naalakkersuisut peqqusisinnapput.

*Imm. 2.* Pissutsit iluarsineqanngippata, imm. 1 malillugu ingerlatamut Naalakkersuisut inerteqquteqarsinnaapput.

## **Kapitali 8**

*Qinnuteqariaaseq, suliamik suliaqarneq, oqartussat suliarinninnerat il.il.*

### *Atuinissamut akuersisummik tunniussineq*

**§ 31.** Akuersisummik qinnuteqartoqarneratigut imaluunniit imm. 2 malillugu akuersissutinik tunniussinissaq pillugu tamanut ammasumik qinnuteqartitsinikkut (neqeroorteqartitsineq) Inatsisartut inatsisaat malillugu Naalakkersuisut akuersissutinik tunniussisinnapput.

*Imm. 2.* Qinnuteqarnissamut piffissaliussaq naatinnagu minnerpaamik ullorsiutini ulluni 90-imi Naalakkersuisut nittartakkamikkut, allatigullu neqeroortitsineq tamanut nalunaarutigissavaa. Toqqaanissami naleqquttunik, kinaassusersiunngitsunik, tunngavilersugaasunillu Naalakkersuisut piumasaqaasiorsinnaapput.

*Imm. 3.* Imm. 1-2 malillugit akuersisummik qinnuteqaat tunniunneqaraluartoq, Inatsisartut inatsisaat malillugu akuersisummik Naalakkersuisut tunniussiniaratik aalajangersinnaapput.

*Imm. 4.* Neqeroortitsinerit pillugit, matumani suleriaasissaq, toqqartuinissami piumasaqaatit aamma naliliinissami ataatsimiititaliat ilanngullugit, malittarisassanik ersarinnerusunik Naalakkersuisut aalajangersaasinnaapput.

### *Qinnuteqaatip imarisaa*

**§ 32.** § 4 malillugu akuersisummik qinnuteqaat tulliuttunik imaqassaaq:

- 1) Ingerlatassat akuersisummik qinnuteqarfigineqartut nassuiaataat.
- 2) Sumiiffiup akuersisummik qinnuteqarfigineqartup sumiinneranik nalunaarut, tak. § 19,
- 3) Piginnittussaataasumut §§ 11-13-imi piumasaqaatinik qinnuteqartup naammassinninneranut uppersaaneq,
- 4) Suliniutip § 15-imi piumasaqaatinik naammassinninneranut uppersaaneq,
- 5) § 29 malillugu pinngortitamut kingunissaanik naliliineq.

6) Illuaraqarfinnut, piniariartarfinnullu sunniutissanik naliliineq

7) Paasissutissat pingaarutillit allat.

*Imm. 2.* Qinnuteqaatip imarisassaanut, matumani qinnuteqartoq aamma suliniut pillugu paasissutissat kiisalu allatigut uppersarsaanissaq pillugit piumasaqaatit ilanngullugit, piumasaqaatinut ersarinnerusunik piumasaqaatinik Naalakkersuisut aalajangersaasinnaapput. § 4 malillugu akuersissutinik qinnuteqaatinut atugassamik, nalinginnaasumik qinnuteqarfissat atornissaannik Naalakkersuisut piumasaqaasiorsinnaapput.

**§ 33.** Atuinissamut akuersisummik qinnuteqaat suliniutissatut pilersaarummik ilaqassaaq. Suliniutissatut pilersaarut ukuninnga imaqassaaq:

- 1) Suliniutip siunertaanik, annertussusaanik, ingerlanneqarnissaanillu nassuiaat kiisalu naatsorsuutigisamik piffissaliussaq.
- 2) Piginnittussaatitaasup nioqqutissiariniagai.
- 3) Nioqqutissiat pitsaassusaat qulakkeerniarlugu piginnittussaatitaasup iliuutsit atorniagai.
- 4) Pisuussutip annertuussusaa, piginnittussaatitaasup atugassatut naatsorsuutigisaa.
- 5) Aningaasalersuinissamik pilersaarut, atuinermullu aningaasatigut angusassatut naatsorsuutigineqartut.
- 6) Kalaallit Nunaanni aamma avataanit sulisunik, pilersuisunillu agguataarineq.
- 7) Suliniutip uninnerani piginnittussaatitaasup sanaartukkamik qanoq torersaanissaanik, aserfallatsaaliinissaanik imaluunniit piiasaanissaanik pilersaarutaa.
- 8) Paasissutissat pingaarutillit allat.

*Imm. 2.* Pilersaarutip nassuiaataanut, matumani ilusissaa imassaalu ilanngullugit, ersarinnerusunik malittarisassanik Naalakkersuisut aalajangersaasinnaapput.

**§ 34.** § 10 malillugu avammut tunisinissamut akuersisummik qinnuteqaat ukuninnga imaqassaaq:

- 1) Avammut tunisinissap siunertaanik nassuiaat.
- 2) Nioqqutissiorneq Kalaallit Nunaanni imaluunniit avataani pissanersoq imaluunniit annertuokkuutaartunik imermik avammut tunisisoqassanersoq pillugu paasissutissat.
- 3) Erngup imaluunniit sermip avammut nioqqutissatut akuersisummik qinnutigineqartut qanoq annertutiginissaanik missiliuut.
- 4) Nuna suna avammut tunisiffissatut qinnutigineqarnersoq.
- 5) Avammut tunisinissamut akuersisummi piffissaq, ilaatigullu aalajangersimasumik nassiussassatut qinnutigineqartoq.
- 6) Assartueriaasissaq, avammullu tunisinermut atatillugu avatangiisinut sunniutissatut nalilerneqartut.
- 7) Paasissutissat pingaarutillit allat.

*Imm. 2.* Avammut tunisinissamut akuersisummi sermeq, imerlu inuussutissatut imaluunniit nerisassiornermi atugassatut atorneqassappata, peqqissutsimut aamma eqqiluisaarnermut akuersissutinut, matumani imip pitsaassusaanut ilanngullugu, uppersarsaatit qinnuteqaammut ilanngunneqassapput.

*Imm. 3.* Avammut tunisinissamut akuersissutip nutarterneqarnissaaq qinnuteqarnermi, imm. 1-2-mi aalajangersakkat assinganik atuutissapput.

*Imm. 4.* Avammut tunisinissamut akuersissutinik qinnuteqaatinut ersarinnerusunik malittarisassanik Naalakkersuisut aalajangersaasinnaapput. § 10 malillugu avammut tunisinissamik akuersissutinik qinnuteqaatinut atugassamik, nalinginnaasumik qinnuteqarfissat atornissaannik Naalakkersuisut piumasaqaasorsinnaapput.

**§ 35.** Piumasaqaatit §§ 32-34-mi aalajangersarneqartut qinnuteqaatip naammassinngippagit, Inatsisartut inatsisaat manna malillugu qinnuteqaat Naalakkersuisut itigartissavaat.

*Imm. 2.* Qinnuteqaatip itigartinnissaa sioqqullugu, qinnuteqartoq qinnuteqaammik iluarsinissaanut sapaatip akunnerinik 4-nik Naalakkersuisut periarfississavaat. Piffissaliunneqartoq malinneqanngippat, qinnuteqartoq erngertumik itigartinneqassaaq.

*Imm. 3.* Immikkut ittumik pisoqartillugu, imm. 2-mi piffissaliussamit Naalakkersuisut immikkut akuersissuteqarsinnaapput.

#### *Tusarniaaneq*

**§ 36.** § 4 malillugu akuersissummik tunniussinissaq pillugu Naalakkersuisut aalajangiitinnagit, kommunimi sumiiffimmi akuersissuteqarfissami kommunalbestyrelsi tusarniaaffigineqassaaq.

*Imm. 2.* Suliniut inuiaqatigiinnut, avatangiisinut imaluunniit inuussutissarsiutinut tunngasunik annertuumik kinguneqarsinnaasoq Naalakkersuisut nalilerpassuk, §§ 32-34 malillugu qinnuteqaammi attuumassuteqartut Naalakkersuisut tamanut ammasumik tusarniutigissavaat.

*Imm. 3.* Tusarniaanerup sivikinnerunissaanut imaluunniit sivilunerunissaanut immikkut pissutissaqanngippat, tusarniaanermi piffissaliussaq sapaatip akunnerini sisamaassaaq.

#### *Oqartussat suliarinninnerat*

**§ 37.** Inatsisartut inatsisaat manna malillugu allaffissornikkut suliaassat, matumani aamma nakkutilliinissaq aamma qinnuteqaatinik suliaqarnissaq ilanngullugit, pisortani oqartussanut allanut imaluunniit namminersortumut Naalakkersuisut suliakkiutigisinnaavaat. Akisussaaffik sulii Naalakkersuisuniippoq.

*Imm. 2.* Imm. 1 malillugu suliaassat namminersortumut suliaqqiunneqarpata, Pisortat ingerlatsineranni suliaassat suliarineqartarnerat pillugu Inatsisartut inatsisaat, Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat aamma Inatsisartut Ombudsmandiat pillugu Inatsisartut inatsisaat suliffeqarfiup suliaasaqarfimmik isumaginninnerani atuutissapput.

*Imm. 3.* Inatsisartut inatsisaata matuma atornissaa, matumani qinnuteqaatinik suliaqarnissaq, maalaaruteqarsinnaaneq kiisalu Inatsisartut inatsisaat manna malillugu akuersissutinik tunniussisarneq ilanngullugit, malittarisassanik ersarinnerusunik Naalakkersuisut aalajangersaasinnaapput.

## Kapitali 9

### *Utertitsineq*

**§ 38.** Inatsisartut inatsisaat malillugu akuersisummik Naalakkersuisut utertitsisinnaapput, matumani ima pisoqarpat:

- 1) piginnittussaatitaasup §§ 11-13-imi piginnittussaatitaanermut piumasaqaataasut naammassinngippagit, tak. § 14.
- 2) § 22-mi ingerlatsinissamut piumasaqaataasooq piginnittussaatitaasup naammassinngippagu.
- 3) akuersisummi piumasaqaataasut piginnittussaatitaasup annertuumik imaluunniit ataasiaannarani unioqqutippagu.
- 4) akuersisummik tunniussinermi tunngaviusut annertuumik allanngorpata.
- 5) Inatsisartut inatsisaat manna malillugu akuersissut malillugu ingerlatsinerni nuna, kangerluk, imaq imaluunniit pinngortitaq annertuumik ajoquseratarsinnaalerpat, tak. § 29 imaluunniit
- 6) §§ 30, imm. 1, aamma 40, imm. 1 malillugit peqqussut piginnittussaatitaasup malinngippagu.

**§ 39.** Naalakkersuisut akuersisummik utertitsinissaq pillugu aalajangiitinnagit, piginnittussaatitaasooq pissutsinik akuersisummik utertitsinissamut tunngavissiisunik iluarsiinissaanut Naalakkersuisut piffissalissavaat, pisoq iluarsineqarsinnaanngitsoq Naalakkersuisut nalilinngippassuk.

*Imm. 2.* Piffissaliussap iluani piginnittussaatitaasup pisoq iluarsinngippagu, Naalakkersuisut akuersissut utertissinnavaat.

## Kapitali 10

### *Nakkutilliineq, nalunaarusiortussaatitaanerlu*

#### *Nakkutilliineq, peqqusinerlu*

**§ 40.** Inatsisartut inatsisaat manna malillugu piginnittussaatitaasup ingerlatsineranik Naalakkersuisut nakkutilliissapput, Inatsisartullu inatsisaata kiisalu Inatsisartut inatsisaat malillugu najoqqutassatut aamma piumasaqaatit aalajangersarneqartut malinneqarnissaannik peqqusisinnaallutik.

*Imm. 2.* Nakkutilliinermi pisariaqartillugu, matumani aamma siumut ilimasaarutitaqanngitsumik nakkutilliinissaq ilanngullugu, nakkutilliisuni sulisoq eqqartuussivimmi aalajangiinertaqanngitsumik aammalu pisariaqartumik kinaassutsimut uppersaammik takutitsinikkut suliffeqarfimmut tamarmut qaqugukkulluunniit isersinnaapput.

*Imm. 3.* Naleqquttumik piffissaliussap iluani peqqussutigineqartoq piginnittussaatitaasup naammassinngippagu, piginnittussaatitaasup akiligassaanik, namminerlu akisussaaffigisassaanik peqqussutigineqartoq Naalakkersuisut naammassitissinnaavaat

*Imm. 4.* Imm. 3 malillugu peqqussutip naammassineqarnissaanut atatillugu Naalakkersuisut aningaasartuutigisaat pisortanut akiitsutut isigineqassapput, Kalaallit Nunaannilu pisortanut akiitsut akilersinniarneqartarnerini malittarisassat atuuttut naapertorlugit Akileraartarnermut Aqutsisoqarfimmit akilersinniarneqarsinnaallutik.

*Imm. 5.* Nakkutilliinissamut, matumani nakkutilliinerup ingerlanneqarnissaa ilanngullugu, ersarinnerusunik malittarisassanik Naalakkersuisut aalajangersaasinnaapput.

*Paasissutissiisussaatitaaneq, nalunaarusiortussaatitaanerlu*

**§ 41.** Piginnittussaatitaasup allallu Inatsisartut inatsisaat manna malillugu akuersissummik qinnuteqartut, inatsisartut inatsisaat malillugu suliffimmi imaluunniit ingerlatami oqartussat suliamik suliarinninnissaanni paasissutissat aamma uppersaatissat tamaasa pisariaqartut tunniutissavaat. Naalakkersuisut piginnittussaatitaasut qinnuteqartullu peqqusinnaavaat, suliap suliarineqarnissaanut paasissutissanik uppersaatinillu taamatut aammalu Naalakkersuisut pisariaqartitaattut iluseqartumik tunniussissasut.

**§ 42.** Akuersissut malillugu ingerlatat, akuersissummi piumasaqaataasut aamma Inatsisartut inatsisaat manna naapertorlugit ingerlanneqartut piginnittussaatitaasoq ukiumut ataasiarluni uppersaasassaaq.

*Imm. 2.* Piginnittussaatitaasup ukiumoortumik nalunaarusiornermi nalunaarutigissavaa sermeq, imerlu qanoq annertutigisoq atorineqarsimanersoq.

*Imm. 3.* Avammut tunisinissamut akuersissummut piffissaliussap naanerani, avammut tunineqarsimasut pillugit § 10 malillugu piginnittussaatitaasoq nalunaaruteqassaaq. Nioqqutit avammut tunineqarsimasut aamma sermeq, imerlu nunanut tunitsiviusunut agguataarnerinik, matumani nioqqutissanik eqqussuisup tamakkiisumik imaluunniit ilaannakortumik nassiussanik tigusiomasimanninneranut pissutsit pillugit paasissutissat ilanngullugit, nalunaarut paasissutissaqassaaq.

*Imm. 4.* Nalunaarusiortussaaq pillugu, matumani uppersaanissaq ilanngullugit, malittarisassanik ersarinnerusunik Naalakkersuisut aalajangersaasinnaapput.

**§ 43.** Naalakkersuisut piginnittussaatitaasoq peqqusinnaavaat, § 24 malillugu akiliutissap naatsorsorneqarneranut aamma akilerneqarneranut ilaliussatut uppersaatinik saqqummiussissasoq kiisalu paasissutissanik misissuissasoq.

## **Kapitali 11**

### *Aalajangersakkat allat*

#### *Tunniussineq*

**§ 44.** Akuersissut toqqaannartumik imaluunniit toqqaannangitsumik allanut tunniunneqarsinnaanngilaq, aatsaallu tunniussinissaq aamma tassunga piumasaqaataasut Naalakkersuisut akuerippatigit tunniussisoqarsinnaalluni.

*Imm. 2.* Imm. 1 naapertorlugu akuersissummik tunniussineq aatsaat akuerineqarsinnaavoq, piginnittussaataasup §§ 11-13-imi piumasaqaataasut naammassippagit..

*Imm. 3.* Inatsisartut inatsisaat manna malillugu akuersissut akiitsoqarfinnit malersorneqarnernut atorneqarsinnaanngilaq.

### *Akiliut*

**§ 45.** Inatsisartut inatsisaat manna malillugu akuersissutininik qinnuteqaatit, aalajangiinerillu allat suliarineqarnerinut Naalakkersuisut akiliuteqartitsisinnaapput.

*Imm. 2.* Akuersissutininik tunniussinermut akiliutit akilerneqarnissaat pillugit, matumani akiliutit annertussusissaat ilanngullugu, Naalakkersuisut ersarinnerusunik malittarisassiorsinnaapput.

### *Inatsisit allat*

**§ 46.** Kalaallit tunisassiaasa avammut nioqqutigineqartarnerat pillugu akuersissuteqartarnermut Inatsisartut peqqussutaat, Inatsisartut inatsisaat manna malillugu avammut tunisinissammut akuersissut malillugu serminut, imermullu avammut tunisinermut atuutinngilaq.

*Imm. 2.* Kalaallit Nunaannut, Kalallit Nunaannit Kalaallit Nunaannilu usinik imaatigut assartuineq pillugu Inatsisartut peqqussutaat, ingerlatanut akuersissummi Inatsisartut inatsisaat manna malillugu tunniunneqartumi pineqartunut ilaasunut atatillugu imaatigut assartuussinermut atuutinngilaq.

*Imm. 3.* Kalaallit Nunaata imartaani akisussaaffeqarfiusumi inuussutissarsiornikkut ingerlataqartarnek pillugu Inatsisartut inatsisaat, Inatsisartut inatsisaat manna malillugu akuersissummut ilaallutik umiarsuarnit ingerlatanut atuutinngilaq.

### *Eqqartuussivilersuussisinnaaneq, isumaqatigiissitsiniarnerlu*

**§ 47.** Pissutsit Inatsisartut inatsisaanni pineqartunut ilaasut pillugit aalajangiinerit, ukiup ataatsip iluani eqqartuussivinnut Kalaallit Nunaanni piginnaatitaaffeqartunut suliaqqiunneqarsinnaapput, taamaattoq takuuk §§ 48 aamma 49.

*Imm. 2.* Aalajangiinerup eqqartuussivinnut suliaqqiunneqarnera, Naalakkersuisut allamik aalajangiussisimanngippata, kinguartitsinermik sunniuteqassanngilaq.

*Imm. 3.* Pissutsit Inatsisartut inatsisaanni pineqartunut ilaasut pillugit aalajangiinerit eqqartuussivinnut suliaqqiunneqartut, siullertut Nunatsinni Eqqartuussivimmuut suliaassiissutigineqassapput.

*Imm. 4.* Imm. 1-imi piffissaliussaq, ullormi aalajangiineq illuatungerisamut nalunaarutiginerani atuutilissaaq.

## **Kapitali 12**

*Pinngitsaaliissummik taarsiissutitalimmik pigisanik piginnikkunnaarsitsineq*

**§ 48.** Inatsit manna malillugu ingerlatassat ingerlanneqarnissaannut pisariaqartillugu, pinngitsaaliissuumik taarsiissutitalimmik pigisanik piginnikkunnaartitsinermi Namminersorlutik Oqartussat piginnaatitaapput, piginnittussaataasut Naalakkersuisullu atorsinnaasaannik pigisanik aalaakkaasunik pigisaqalernissamut. Pinngitsaaliissummik taarsiissutitalimmik pigisanik piginnikkunnaarsitsineq pissaaq pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsineq pillugu Inatsisartut inatsisaanni malittarisassat malillugit.

**§ 49.** Pisortat pilersuinerat qulakkeerumallugu pisariaqartillugu, pinngitsaaliissummik taarsiissutitalimmik pigisanik piginnikkunnaarsitsinermi Namminersorlutik Oqartussat piginnaatitaapput Naalakkersuisut aamma pisortat pilersuiviisa atorsinnaasaannik pigisanik aalaakkaasunik pigisaqalernissamut kiisalu inatsisartut inatsisaat manna malillugu akuersisummik utertitsinissaminut imaluunniit annikillisisinissaminut. Pinngitsaaliissummik taarsiissutitalimmik pigisanik piginnikkunnaarsitsineq pissaaq pigisanik aalaakkaasunik pinngitsaaliissummik taarsiissutitalimmik pigisanik piginnikkunnaarsitsineq pillugu Inatsisartut inatsisaanni malittarisassat malillugit.

### **Kapitali 13**

*Pineqaatissiissutit*

**§ 50.** Tulliuttumi unioqqutitsinernut, Kalaallit Nunaanni pinerluttulerinermut inatsimmi maleruagassat malillugit akiliisitsinermik pineqaatissiinermik malitseqartitsisoqarsinnaavoq:

- 1) § 3, imm. 1-imi, § 16, imm. 2-mi oqaaseqatigiit siullermi aamma § 19, imm. 1-imi aalajangersarneqartutut imaluunniit § 5, imm. 2 aamma § 6, imm. 2 malillugit akuersisummik pigisaqarani niuerneq siunertaralugu sermimik, imermillu misissueqqissaarnernut, atuinernut imaluunniit avammut nioqquteqarnernut.
- 2) Akuersisummut ilaasumik § 26, imm. 1-imi, tak. § 26, imm. 2-mi aalajangersarneqartutut sillimmasiissuteqarani imaluunniit allatigut qularnaveeqquteqarani ingerlatsisumut.
- 3) § 30, imm. 1, aamma § 40, imm. 1 malillugit peqqusummik imaluunniit § 30, imm. 2 malillugu inerteqqummik malinninngitsumut.
- 4) Akuersisummi piumasaqaatinik malinninngitsumut, matumani immikkut akuersissutit Inatsisartut inatsisaat malillugu imaluunniit Inatsisartut inatsisaat malillugu malittarisassat malillugit tunniunneqartut ilanngullugit.
- 5) Pisortani oqartussamut paasissutissanik eqqunngitsunik imaluunniit allamut saatsitsiniarluni kukkusunik tunniussisunut imaluunniit Inatsisartut inatsisaat malillugu malittarisassiuunneqartut malillugit pisortani oqartussamut paasissutissanik tunniussisussaataitanermik naammassinninngitsumut.
- 6) § 40, imm. 2 malillugu nakkutilliisussamik isitsaaliuisumut

*Imm. 2.* § 4, imm. 5, § 5, imm. 3, § 6, imm. 3, § 8, imm. 5, § 10, imm. 4, § 16, imm. 5, § 20, imm. 4, § 26, imm. 4, § 28, imm. 2, § 29, imm. 3, aamma § 42, imm. 4, malillugit

malittarisassiuunneqartuni, Kalaallit Nunaanni pinerluttulerinermut inatsimmi maleruagassat malillugit akiliisitsinermik pineqaatissiinermik malitseqartitsisoqarsinnaavoq.

*Imm. 3.* Inatsisartut inatsisaat imaluunniit malittarisassat Inatsisartut inatsisaat naapertorlugu aalajangersagaasut akiliisitsinissaq inatsisitigut tunngavissaqartippassuk, Kalaallit Nunaanni pinerluttulerinermut inatsimmi maleruagassat malillugit inuk inatsisitigut pisinnaatitaasoq akiliisitaanissamut pisussaaffilerneqarsinnaavoq.

*Imm. 4.* Akiliisitsinerit, Inatsisartut inatsisaat imaluunniit Inatsisartut inatsisaat malillugu malittarisassat aalajangersarneqartut malillugit pineqaatissiissutigineqartut, Nunatta Karsianut nakkartinneqassapput.

*Imm. 5.* Imm. 1-2 malillugit akiliisitsinermik pineqaatissiisoqarsinnaatillugu, Kalaallit Nunaanni pinerluttulerinermut inatsimmi maleruagassat malillugit aamma arsaarinnittoqarsinnaavoq. Arsaarinnissutit Nunatta Karsianut nakkartinneqassapput.

## Kapitali 14

*Atuutilernera, atorunnaarsitsineq aamma ikaarsaarnermi aalajangersakkat*

**§ 51.** Inatsisartut inatsisaat manna 1. januar 2027-mi atuutilerpoq.

*Imm. 2.* Peqatigisaanik Sermip ergullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imeersoq atorunnaarsinneqarpoq.

*Imm. 3.* Imm. 1 malillugu Inatsisartut inatsisaata atuutilernissaa sioqqullugu akuersissut tunuliaqutaralugu atuinissamut pilersaarutit aamma uninissamut pilersaarutit akuerineqarnissaannik qinnuteqaatit, Sermip ergullu niuernikkut iluaqutigineqarnissaat pillugu Inatsisartut inatsisaat nr. 11, 27. november 2018-imi malittarisassat manna tikillugu atuuttut malillugit suliarineqassapput. Akuersisummik qinnuteqaat Inatsisartut inatsisaat manna malillugu suliarineqassasoq qinnuteqartup qinnutigisinnaavaa.

*Imm. 4.* Inatsisartut inatsisaat manna malillugu ingerlatassanut akuersisummik qinnuteqaatit, Inatsisartut inatsisaata atuutilernera sioqqullugu imm. 1 naapertorlugu tunniunneqartut, Inatsisartut inatsisaat manna malillugu suliarineqarnerat ingerlateqqinneqassaaq.

*Namminersorlutik Oqartussat, ulloq xx. xx 2026*

Naalakkersuisut Siulittaasuut